

四庫全書

經部

欽定四庫全書

經部

周官集注卷十九

詳校官監察御史臣施朝幹

刑部郎中臣許兆椿覆勘

覆校官侍講臣劉亨地

校對官侍詔臣胡士震

謄錄監生臣陳山峴

欽定四庫全書

周官集注卷九

翰林院侍講銜方苞撰

秋官司寇第五

寇害也刑之設以除民害天地之氣春生秋殺故
司寇為秋官

惟王建國辨方正位體國經野設官分職以為民極乃
立秋官司寇使帥其屬而掌邦禁以佐王刑邦國

孝經說曰刑者例也過出罪施王制曰例者成也一成而不可變故君子盡心焉

刑官之屬大司寇卿一人小司寇中大夫二人士師下大夫四人鄉士上士八人中士十有六人旅下士三十有二人府六人史十有二人胥十有二人徒百有二十人

士察也主察獄訟之事遂士縣士方士皆別設官而鄉士即用司寇之屬士者所受國中之獄訟其治在

國中也諸官皆上士八人中士十有六人以給官中之事而司寇之屬士獨兼受國中之獄訟者諸官之事紛秋官則所掌惟獄訟而四郊之獄訟鄉師聽之而後達于鄉士遂之獄訟遂大夫遂師聽之而後達于遂士公邑都家之獄訟守土者聽之而後達于縣士方士其獄辭皆已定矣其上達則士師察其辭小司寇附其法大司寇斷而行其令故司寇之屬士雖使兼受國中之獄訟而不患其不暇給也四官之事

有司分治之使官中之士兼之則侵官也則離局也
司寇聽獄訟羣士司刑皆在各麗其灋獻其議雖他人
所上獄訟亦公聽而共成之則雖使兼受國中之獄
訟而非侵官無離局也且四郊之獄訟鄉師聽之必
內達于鄉士者以獄之成必取決于司寇也國中之
獄訟無外訴于鄉師之理故使司寇之屬士受之觀
此類則聖人精義致用之學見矣

遂士中士十有二人府六人史十有二人胥十有二人

徒百有二十人

縣士中士三十有二人府八人史十有六人胥十有六人徒百有六十人

方士中士十有六人府八人史十有六人胥十有六人徒百有六十人

訝士中士八人府四人史八人胥八人徒八十人

掌訝乃迎賓客此迎受四方獄訟故以士名

朝士中士六人府三人史六人胥六人徒六十人

司民中士六人府三人史六人胥三人徒三十人
司刑中士二人府一人史二人胥二人徒二十人
司刺下士二人府一人史二人徒四人

刺者探問廉察之意官主詢察而行赦宥故以刺名
後世設刺史亦義取詢察舊說刺殺非也

司約下士二人府一人史二人徒四人

薛平仲曰或疑司約司盟非盛世事然世變益降使
私為約私為盟以紛紛于下孰若設官于上以司之

使不可逾乎盟約不逾則訟獄可息此先王之不得已也

司盟下士二人府一人史二人徒四人

盟者約辭告神殺牲歃血明著其信也曲禮曰涖牲曰盟書載苗民罔中于信以覆詛盟則五帝之世已有此事第苗民覆之故數以為罪耳春秋傳成王勞周公太公而賜之盟穀梁子謂盟詛不及三王非也學者不察或以周官設司盟而信何休戰國陰謀之

說誤矣

職金上士二人下士四人府二人史四人胥八人徒八十人

司厲下士二人史一人徒十有二人

犯政為惡曰厲

犬人下士二人府一人史二人賈四人徒十有六人

司圜中士六人下士十有二人府三人史六人胥十有六人徒百有六十人

掌囚下士十有二人府六人史十有二人徒百有二十人

掌戮下士二人史一人徒十有二人

司隸中士二人下士十有二人府五人史十人胥二十人徒二百人

隸給勞辱之役者

罪隸百有二十人

蠻隸百有二十人

閩隸百有二十人

夷隸百有二十人

貉隸百有二十人

皆征伐所獲也此選以為役員者餘謂之隸民○王
次點曰南方曰蠻閩東南之別種也東方曰夷貉東
北之聚落也獨不見西戎北狄之隸者蓋自文王時
西有昆夷之患北有獫狁之難而道化先被于南至
武王通道于九夷八蠻其服屬有素故帥以為隸○

四翟之隸皆慕義而來願留中夏者故因其能而各任以事焉謂之隸者王宮宿衛宮伯所掌士庶子也旅賁皆命士也虎賁所掌謂之虎士必粗知道藝而有異于胥徒者故于司隸所掌稱隸以別之春秋傳人有十等隸班在六非甚賤也盜賊之子亦使班于四隸者非其身之惡也不使列于齊民者恐其習為匪僻也

布憲中士二人下士四人府二人史四人胥四人徒四

十人

禁殺戮下士二人史一人徒十有二人

禁暴氏下士六人史三人胥六人徒六十人

野廬氏下士六人胥十有二人徒百有二十人

蜡氏下士四人徒四十人

蜡骨肉腐臭蠅蟲所蜡也○蜡祭以息老物掩骼埋
啣又死者之終也或取義於此

雍氏下士二人徒八人

雍謂隄防止水者

萍氏下士二人徒八人

萍氏主水禁萍草無根而浮義取于不沉溺也

司寤氏下士二人徒八人

寤覺也主夜覺者

司烜氏下士六人徒十有二人

烜火也

條狼氏下士六人胥六人徒六十人

條當為滌滌除狼扈道上者

修閭氏下士二人史一人徒十有二人

閭謂里門

冥氏下士二人徒八人

冥以繩縻取禽獸之名蓋攻猛獸必使冥然不覺然後可獲或曰猛獸旦晝多伏藏設弧張為阱獲每以暮夜昏冥之時而得之○薛平仲曰自修閭達布憲官十有一皆先王所以盡乎人也自冥氏至庭氏官

十有二皆先王所以盡乎物也人事之害既除而物之為人害者亦消則先王之用刑通乎天地矣○王氏曰觀周禮所載一草木一鳥獸一昆蟲小小利害必為民興之除之而凡興利則地官主之凡除害則秋官主之

庶氏下士一人徒四人

庶讀如藥煮之煮驅除毒蠱之言○鄭剛中曰南中為蠱者合衆毒蠱于一器使自相啗其一獨存則為

蠱官以庶名豈義取于此與○劉執中曰毒蠱蠱病人非一種而僅設下士一人者蓋掌其方書治禁之

灋

穴氏下士一人徒四人

翬氏下士二人徒八人

柞氏下士八人徒二十人

柞除木之名除木者必先刊剝之詩云載芟載柞芟為除草則柞為除木可知

薙氏下士二人徒二十人

薙剪草也或作夷或曰讀如髻小兒頭之髻月令曰
燒薙行水謂燒所芟草乃水之

哲族氏下士一人徒二人

哲讀為擿族謂鳥巢

剪氏下士一人徒二人

赤友氏下士一人徒二人

赤友猶赫拔謂除去之也

蝮氏下士一人徒二人

蝮蝦蟇也

壺涿氏下士一人徒二人

壺謂瓦鼓涿擊之也

庭氏下士一人徒二人

主射妖鳥令國中潔清如庭內也

銜枚氏下士二人徒八人

枚狀如箸橫銜之為之繡結于項以止言語

伊耆氏下士一人徒二人

伊耆古王者號始為蜡祭以息老物此掌共杖函故以名官秋物成而養老故列于秋官

大行人中大夫二人小行人下大夫四人司儀上士八人
中士十有六人行夫下士三十有二人府四人史八人胥八人徒八十人

環人中士四人史四人胥四人徒四十人

象胥每翟上士一人中士二人下士八人徒二十人

通四裔之言者東方曰寄南方曰象西方曰狄鞮北方曰譯今總名曰象者周之德先致南方也

掌客上士二人下士四人府一人史二人胥二人徒二十人

掌訝中士八人府二人史四人胥四人徒四十人

掌交中士八人府二人史四人徒三十有二人

掌察四方中士八人史四人徒十有六人

掌貨賄下士十有六人史四人徒三十有二人

朝大夫每國上士二人下士四人府一人史二人庶子
八人徒二十人

此王之士也使主都家之治而命之曰朝大夫所以
尊王朝也庶子在府史之下蓋其官長所自辟除也
都家之司馬既掌其士庶子之政學以聽國司馬而
此職及都則復設庶子者豈掌鄉八刑以糾都家之
民者與其以庶子稱者教刑本為士庶子設而因以
下逮于庶民也

都則中士一人下士二人府一人史二人庶子四人徒八十人

都則主都家之八則者當言每都如朝大夫及都司馬云○易彥祥曰八則都家所同守也然謂之都則而不言家則何也王之大夫四命雖馭之以八則而未與賜則之數也故大宰以八則治都鄙亦以都為主

都士中士二人下士四人府二人史四人胥四人徒四

十人家士亦如之

亦當言每都

秋官卿大夫上士共三十三人而中士下士四百有二人
蓋位卑則不敢怙勢以枉人職分乃易于悉心以體物也
大司寇之職掌建邦之三典以佐王刑邦國詰四方

刑邦國即下經用三典于三等之國是也蓋刑邦國
之民若諸侯之不率者則九伐施焉非五刑所及也
既曰刑邦國又曰詰四方蓋詰四方邦國之用刑而

不率三典者大宰以刑典詰邦國即此義也

一曰刑新國用輕典二曰刑平國用中典三曰刑亂國用重典

新建之國民未習教故用法輕亂國俗狃于惡非重灋不足以革之平國則但用常行之灋○王介甫曰用輕典以柔乂也用中典以正直乂也用重典以剛乂也故曰惟敬五刑以成三德

以五刑糾萬民一曰野刑上功糾力二曰軍刑上命糾

守三曰鄉刑上德糾孝四曰官刑上能糾職五曰國刑
上愿糾暴

功工程也命將命也守部分也愿慈慎也國刑謂國
中之刑曰野曰鄉曰國非以地別之以事別之也水
土力役之政野刑也故曰上功糾力不孝不友不睦
不婣不任不恤鄉刑也故曰上德糾孝吏之作奸民
之為暴勢家之滅義國刑也故曰上愿糾暴雖國中
野外之人所犯鄉刑也則以鄉刑弊之易地皆然

以園土聚教罷民凡害人者寘之園土而施職事焉以
明刑恥之

民不昏作勞故謂之罷害人謂為邪惡已有過失麗
于灋者○民罷于作業則必放辟邪侈而有害于人
寘之園土欲其困而悔也施以職事欲其勞而思也
其能改者反于中國不齒三年其不能改而出園土者
殺

中國謂故鄉里也不齒者不得以年次列于平民出

逃亡也反其鄉里而曰中國者使終不改則當屏之
遠方也

以兩造禁民訟入束矢于朝然後聽之

古者一弓百矢束矢百矢也先入百矢不實則沒入
官○注造至也不至則是自服不直非也無論所訟
虛實未有被訟而不自質辨者果自知不直而不至
為吏者當致其人平其事而後可以息爭未有置而
不聽者蓋造者作事之端兩造者各陳其致爭之由

也書曰兩造具備則不可以至訓明矣曰禁民訟者或事端微細或曲直顯然則立使解散而不復致于朝也

以兩劑禁民獄入鈞金三日乃致于朝然後聽之

劑券書也三十斤為鈞訟是非可立決者也兩造具備則曲直可判矣獄遲久而後決者也或負財物或背婚媾其約劑有真偽左證有存亡未可以一言而決必致于獄然後其罪可定故所入加重又緩其期

然後聽之舊說以罪相證非也以罪相證無緣有兩劑若官司所守彼此爭執則各于其長訴之附于刑而後歸于士

以嘉石平罷民凡萬民之有罪過而未麗于灋而害于州里者桎梏而坐諸嘉石役諸司空重罪旬有三日坐期役其次九日坐九月役其次七日坐七月役其次五日坐五月役其下罪三日坐三月役使州里任之則宥而舍之

嘉石文石也樹之外朝門左平成也成之使入于善
任保也此曰未麗于法則園土之罷民為已麗于法
者可知矣園土之罷民曰害人是實有被其害之人
此曰害于州里則頑嚚酗肆為州里所患苦耳○李
耜卿曰過大內于園土過小坐諸嘉石刑戮之事為
類至多大司寇獨舉此二者蓋辟以止辟莫善于此
以肺石達窮民凡遠近憚獨老幼之欲有復于上而其
長弗達者立于肺石三日士聽其辭以告于上而罪其

長

肺石赤石也無兄弟曰惇無子孫曰獨復猶報也

正月之吉始和布刑于邦國都鄙乃縣刑象之灋于象
魏使萬民觀刑象挾日而斂之

凡邦之大盟約泣其盟書而登之于天府大史內史司
會及六官皆受其貳而藏之

大盟約謂因大會同而賜諸侯以盟或使約誓也邦
之大盟約有或背之則征討必行六官皆有事焉故

並藏其貳又使邦人及諸侯知所約之必不可犯也
凡諸侯之獄訟以邦典定之凡卿大夫之獄訟以邦灋
斷之凡庶民之獄訟以邦成弊之

邦典六典也邦灋八灋也邦成八成也諸侯之獄訟
如虞芮質成之類非九伐之灋所及也故以邦典定
之如疆場之爭則所犯教典政典也婚姻相負則所
犯禮典也川防之閉縱則所犯事典也本無重輕一
定之灋必隨事而酌定之卿大夫之獄訟以八灋斷

之者官職之不舉官聯之不會官常之不修官成之
不守官灋之不遵官刑之不當官計之不實國有常
刑也若卿大夫而有土地財物之訟亦當以八成弊
之

大祭祀奉犬牲若禋祀五帝則戒之日涖誓百官戒于
百族

戒之日即卜之日也百族王之族姓也郊特牲獻命
庫門之內戒百官也大廟之內戒百姓也則為王之

族姓明矣冢宰司徒職首言祀五帝後皆曰享先王亦如之下此不與也宗伯職則備言祀大神享大鬼祭大亦司馬職總言大祭祀此既總言大祭祀又特舉禋祀五帝豈凡祭祀之戒誓大宰小宰掌之司寇不涖惟祀五帝即事于郊野其事尤嚴故兼使刑官之長涖之猶朝覲會同司寇必前王大賓客小司寇前王而辟王燕出入士師前驅而辟之義與小司寇及士師職皆特舉祀五帝蓋刑官之正貳及考皆從

而蹕者又其屬聖人慮事之詳如此○王氏曰百族
從祭而不預于執事所以不聽誓而聽戒也

及納亨前王祭之日亦如之奉其明水火

納亨致牲也其節在將祭之辰祭之日謂旦明也明
火見春官華氏以陰鑑取水于月謂之明水水以
配鬱鬯與五齊火以給饗烹秋氣清明日至此而燥
烈月至此而皎潔故明水火使秋官奉之以致其清
明之德也

凡朝覲會同前王大喪亦如之

大喪所前或嗣王或時王

大軍旅泣戮于社

社謂社主在軍者

凡邦之大事使其屬蹕

屬士師以下也○王介甫曰小司寇凡國之大事使其屬蹕則事在國中而已大司寇邦之大事使其屬蹕則通國野焉

小司寇之職掌外朝之政以致萬民而詢焉一曰詢國
危二曰詢國遷三曰詢立君

外朝在雉門之外詢謀也國危謂有兵寇之難也立
君謂無冢適選于庶也司徒掌萬民而使刑官致之
者三者皆國之變事以刑官蒞之則進而陳其儉謀
退而動以浮言者不禁而自戢矣其不以大司寇何
也其職擯而叙進以傳語王與六卿並聽之秋官之
長不得獨去其列而為擯也

其位王南鄉三公及州長百姓北面羣臣西面羣吏東面

經言羣吏即庶官也惟此經及朝士職羣吏為府史以對羣臣羣士而言也百姓北面答君也三公州長北面帥民也羣吏在羣臣之右以主于詢萬民也六鄉之官莫尊于鄉老其親民事者莫尊于州長故使帥焉不及鄉大夫者鄉大夫六卿也孤卿大夫士皆包于羣臣

小司寇擯以敘進而問焉以衆輔志而弊謀

敘進以次而進之使言也○王介甫曰以王志為主而輔之以衆以衆謀為稽而弊之于王

以五刑聽萬民之獄訟附于刑用情訊之至于旬乃弊之讀書則用灋

五刑野刑軍刑鄉刑官刑國刑也附于刑墨劓宮刖殺也羣士士師所議既附于刑小司寇復用情訊之
用情者記所謂悉其聰明致其忠愛以盡之也書者

所書犯灋之由即獄辭也讀之而囚無不服衆以為
宜然後灋可用

凡命夫命婦不躬坐獄訟

不身坐者使其屬與子弟代之也春秋傳王叔之宰
與伯與之大夫禽瑕坐獄于王庭

凡王之同族有罪不即市

刑于甸師氏

以五聲聽獄訟求民情一曰辭聽二曰色聽三曰氣聽

四曰耳聽五曰目聽

四者非聲而要以聲為本故總之曰五聲凡中不直者其言必煩其色必赧其息必喘其聽必惑其視必眊然以是聽之則可以得其無徵之情

以八辟麗邦灋附刑罰一曰議親之辟二曰議故之辟三曰議賢之辟四曰議能之辟五曰議功之辟六曰議貴之辟七曰議勤之辟八曰議賓之辟

麗附也賓謂三恪二代之後辟有以法訓者有以刑

訓者曰以辟麗法則當以刑訓明矣既曰麗邦之
又曰附刑罰者以八等人之刑當特議者附著于邦之
之中而用刑罰時則以是附比之也特議之者輕則
赦宥重則末減也賢而罹于罰者如債軍喪邑之類
或阨于事勢而非其罪也

以三刺斷庶民獄訟之中一曰訊羣臣二曰訊羣吏二
曰訊萬民

刺探取其情實也中成獄之書辭也謂之中者用刑

貴得中也訊問也凡獄訟皆應有刺獨言庶民者賤者尚刺則等而上者可知

聽民之所刺宥以施上服下服之刑

三訊並用而要以民為斷者民所採取乃其情之實也蓋民之所刺而以為可宥者末減可也其不可宥者則權其情罪之輕重而施上服下服之刑即呂刑所謂上刑適輕下服下刑適重上服也司刺言三刺三宥三赦而此不言赦者凡宥必酌于民言若幼弱

老耄蠢愚之應赦者不必刺於民而後得其情也

及大比登民數自生齒以上登于天府內史司會冢宰
貳之以制國用

大比三年大數民之衆寡也人生齒而體備男八月
而生齒女七月而生齒國用出于民故得民數乃制
國用周官登書于天府者四民數則冢宰司會貳之
者以制國用也內史貳之者執國漚國令之貳以逆
會計也賢能之書獨內史貳之者以詔王廢置爵祿

也盟約之書六官皆貳者邦之大盟約若有畔者則
禮樂征伐不行于天下六官皆有責也太史內史司
會復貳之者太史掌約劑內史掌八柄其有會同征
伐則財用計要司會之所職也獄訟之登不書其貳
者自鄉遂都鄙之吏達于羣士羣士達于士師小司
寇訊而弊之大司寇聽之士師受中而致于下書之
者不一而足矣第登中于天府以示罪皆天討而無
事復書其貳也

小祭祀奉犬牲凡禋祀五帝實鑊水納亨亦如之

實鑊水以滌牲也及納亨亦實其水

大賓客前王而辟后世子之喪亦如之小師泣戮凡國
之大事使其屬蹕

孟冬祀司民獻民數于王王拜受之以圖國用而進退
之

司民星名軒轅角也民之夫家老幼衆寡鄉師遂師
鄉大夫遂大夫既以歲時登之稽之而復設司民于

秋官以登其數至獻數于王則不以司徒而以司寇者必服教而不懼于刑然後為天民之良王始得而有之也○王氏曰民之輕生觸法皆由于貧民之貧以國用無節故必使司寇獻民數而制國用也○李邦卿曰孟冬獻民數者一歲之中或民氣安樂或荒札間作因民之登耗可知生斂之豐匱賦入之多少以之圖度國用量入以為出也三年又大比以制國用者天道豐凶之數至此齊矣公私出入之經上下可

較矣民之少者則已壯未老者則既老矣故大比之
而凡受田歸田之令或征或舍之差耕三餘一之法
可斟酌而更定之矣蓋圖者隨分而營度制者總成
而經畫義各有指焉○李世美曰漢文帝一歲斷獄
四百而武帝時乃數萬周官司寇主獻民數使王知
生齒不可耗于刑殺而使民遠罪宜有道也

歲終則令羣士計獄弊訟登中于天府

獄已成辭而附于罪者歲終則總計其數訟之可立

決者則遂斷之也必登斷獄之書于天府者使神監之

正歲帥其屬而觀刑象令以木鐸曰不用灋者國有常刑令羣士乃宣布于四方憲刑禁

宣徧也令羣士舊讀屬上文不可通蓋使鄉士布于鄉遂士布于遂縣士布于野方士布于都家訝士布于四方也

乃命其屬入會乃致事

會者用財之計事者所承職事入之致之並於冢宰
冢宰職令百官府各正其治受其會聽其致事而詔
王廢置是也惟地官秋官有入會致事之文者惟二
官用財紛雜而纖細必各會之以入于冢宰若禮官
政官所用之財則各有經式冢宰司徒之屬共之不
必其官自會也惟二官之職事積日累月而成其案
牘或因于前其得失有考于後故歲終致之而後冢
宰聽之若禮事軍事則時過而事畢無可致也○李

耜卿曰此九字當在登中于天府之下蓋小宰小司徒文皆言考成受會致事方繼以正歲帥屬云云應同

士師之職掌國之五禁之灋以左右刑罰一曰宮禁二曰官禁三曰國禁四曰野禁五曰軍禁皆以木鐸徇之于朝書而縣于門閭

左右輔也刑罰禁民為非預施五禁所以輔之徇于朝示貴者縣于門閭示賤者巷門曰閭

以五戒先後刑罰毋使罪麗于民一曰誓用之于軍旅
二曰誥用之于會同三曰禁用諸田役四曰糾用諸國
中五曰憲用諸都鄙

誓用于軍旅者賞罪用命不用命必出矢言使知必
行也誥用于會同者宣諭以禮義也禁用于田役者
使衆守灋而不敢踰也國中用糾者其民聚可合致
而申警之也都鄙用憲者其地遠必分布而表懸之
也曰用之于者以事言也曰用諸者以地言也

掌鄉合州黨族閭比之聯與其人民之什伍使之相安
相受以比追胥之事以施刑罰慶賞

每鄉而合其聯與什伍也合其聯使之相安相受也
合其什伍以比追胥之事也言鄉則遂與都鄙公邑
可知矣追胥之事司寇所專掌也因使士師每鄉而
合其聯以簡罷民又所以清盜賊之原也其不相安
者則不相受而收之園土坐諸嘉石必能改而州里
任之然後舍之

掌官中之政令察獄訟之辭以詔司寇斷獄弊訟致邦
令

官中大司寇之官府中也獄訟之辭鄉士遂士縣士
方士所議也諸官之司惟此掌官中之政令者宰夫
所掌則通六官之事鄉師分掌其鄉肆師則掌禮事
之小者以佐宗伯惟士師則獄訟之上察其辭以詔
司寇獄訟之成致其令以付羣士凡官中之政令無
不待之以定由之以達者故特文以著之

掌士之八成一曰邦洿二曰邦賊三曰邦諜四曰犯邦
令五曰撓邦令六曰為邦盜七曰為邦朋八曰為邦誣
士之八成獄官斷事之成式有此八品也邦賊為逆
亂者邦諜異國人來反間者如衛禮至仕邢晉殺秦
謀之類撓邦令詐稱以有為者為邦朋朋黨以亂政
者為邦誣誣上以行私者○三代盛時列國分土君
臣同體無所為刺探國事者爾雅井一有水一無水
曰濁洿集韻洿挹取也其諸聚斂培克之臣浚民之

生以虧邦本者與故列于邦賊邦諜之上也

若邦凶荒則以荒辯之灋治之

其歲之祲有差等其地之民有衆寡其民之困有淺深其財之用有多寡其事之施有緩急故曰荒辯之灋

令移民通財糾守緩刑

糾守備盜賊也移民通財地官所掌而又使刑官令之者移民則慮有顛越不恭暫遇姦宄者通財而使

刑官董之則富者知必償而無匿財矣後世救荒有使富民出貸而官為之責者法古之善也

凡以財獄訟者正之以傳別約劑

若祭勝國之社稷則為之尸

易彥祥曰亳社以陰為主故陰訟于是乎聽焉祭祀以刑官為尸從其類也

王燕出入則前驅而辟

燕出入偶以遊燕出入也恐侍御僕從或以邪僻導

王故使刑官糾之且示王不當數遊燕也若宮中燕
出入必從則無暇理邦之刑禁矣

祀五帝則沃尸及王盥洎鑊水

洎謂增其沃汁按特牲少牢尸盥不就洗入門北面
盥以盥匱則王將獻尸宜就洗以盥鑊水小司寇實
之故士師增之小祝職大祭祀沃尸盥小臣職大祭
祀沃王盥鬱人職凡裸事沃盥而祀五帝之沃盥獨
以士師共之凡祭祀亨人實鑊水而祀五帝獨小司

寇實之士師增之豈以即事于郊野刑官之正貳及
司皆前後左右于王以致其嚴而因使共近王之職
事與○張子曰節服氏郊祀有尸不害為稷尸用此
推之凡有尸者皆人鬼也此經祀五帝有尸五人帝
之尸也社稷有尸柱與稷之尸也春秋傳晉祀夏郊
董伯為尸繇之尸也虞夏傳舜入唐郊丹朱為尸魯
之尸也儀禮周公祭泰山以太公為尸古者嶽瀆配
公侯國語山川之靈足以紀綱天下其守為神汪芒

氏之君守封隅之山者也春秋傳臺駘汾神也則亦
為人鬼之尸明矣五祀有尸行神則世傳為黃帝之
子中雷門井戶竈必始為是者也若迎貓迎虎則或
以木禺芻靈記亦未言以人為尸由是言之非人鬼
無尸決矣

凡刳珥則奉犬牲

鄭剛中曰刳當為剗釁禮也珥當為弭即小祝之弭
兵災注曰羽者為岬此奉犬牲不宜言羽

諸侯為賓則帥其屬而蹕于王宮大喪亦如之

大師帥其屬而禁逆軍旅者與犯師禁者而戮之

逆軍旅如春秋傳荀吳之嬖人不肯即卒晉侯之弟
揚干亂行于曲梁之類犯師禁尚書誓寇攘踰垣
牆竊馬牛誘臣妾之類

歲終則令正要會正歲帥其屬而憲禁令于國及郊野
士師先令正要會然後小司寇命入會小司寇令羣
士憲刑禁則士師帥而憲之易刑禁為禁令者懸刑

禁並小司寇之令也正要會在歲終憲禁令在正歲則小司寇職乃命其屬入會乃致事宜在登中于天府之下益明矣

鄉士掌國中各掌其鄉之民數而糾戒之

掌國中者其治所在國中也四郊之獄訟鄉師聽之而後達于鄉士國中之獄訟則鄉士自受之國中四郊之民數則並掌而糾戒之○注鄉士八人言各者四人而各主三鄉恐未安豈二人主國中而六人各

主一鄉中士則四人主國中而十二人分主六鄉與聽其獄訟察其辭辨其獄訟異其死刑之罪而要之旬而職聽于朝

要之取其獄辭之要者為斷也既曰聽其獄訟又曰辨其獄訟者聽之以探其情辨之以附于灋也凡爭訟之附于刑者歸于士則不附于刑者鄉師遂大夫之屬已聽斷使解散矣其附于刑者士又聽之察之辨之三日而後致于司寇公聽于朝其死刑則又別

異其要加審慎也職聽于朝者司寇弊訟斷獄羣士皆在各麗其法獻其議而主六鄉之獄訟者則鄉士也遂士以下皆然○春秋傳使王叔之宰與伯與合要王叔氏不能舉其契

司寇聽之斷其獄弊其訟于朝羣士司刑皆在各麗其灋以議獄訟

麗附也恐專或有濫故公聽之使各以所見附其灋獻其議而後司寇酌度之

獄訟成士師受中計日刑殺肆之三日

受中謂受獄訟之成也古者司寇行戮君為不舉故必累犯灋者同日而刑殺也肆陳其尸也據死者而言其生刑即釋之

若欲免之則王會其期

所欲免親故之等在八議者會其期謂司寇聽獄之日王親往議之也必王就議于外朝者刑人于市與衆棄之非王所得專也

大祭祀大喪紀大軍旅大賓客則各掌其鄉之禁令帥其屬夾道而蹕三公若有邦事則為之前驅而辟其喪亦如之

大祭祀若祀天四時迎氣于四郊喪紀軍旅賓客所經殊方故各掌其鄉之禁令

凡國有大事則戮其犯命者

大事即上大祭祀大喪紀大軍旅大賓客也戮有以刑殺言者秋官掌戮是也有以辱言者司市凡有罪

者撻戮而罰之是也此戮犯命者重輕皆有之舊說
誤

遂士掌四郊各掌其遂之民數而糾其戒令

遂士掌遂之獄訟而治所則在四郊也遠郊乃六鄉
之地而遂士居之者近于遂則民隱可聞不遠于國
中則獄訟易達也鄉士各掌其鄉之民數而糾戒之
者鄉大夫不與民治故鄉士自糾戒也遂士縣士則
各掌其民數而糾其戒令蓋戒令其民遂大夫公邑

吏之職也遂士縣士特糾之耳

聽其獄訟察其辭辨其獄訟異其死刑之罪而要之二旬而職聽于朝

去王城漸遠恐多枉濫故至二旬容其反覆也

司寇聽之斷其獄弊其訟于朝羣士司刑皆在各麗其瀆以議獄訟獄成士師受中計日就郊而刑殺各于其遂肆之三日

刑殺于郊者就遂士之治所也肆各于其遂者與衆

棄之以懲其未也

若欲免之則王令三公會其期

若邦有大事聚衆庶則各掌其遂之禁令帥其屬而蹕
黃文叔曰大事即大祭祀大喪紀大軍旅大賓客鄉
詳其目遂舉其凡也邦之大事遂未必盡與政令及
之而聚其衆庶則掌其禁令

六卿若有邦事則為之前驅而辟其喪亦如之

六卿近則使三公六遂差遠則使六卿

凡郊有大事則戮其犯命者

遂獄在郊故也

縣士掌野各掌其縣之民數糾其戒令

距王城二百里以外至三百里曰野縣士通掌五百里內公邑而言掌野者包內外而言之也縣士三十人二人豈每方三等公邑各以八人分主之與

而聽其獄訟察其辭辨其獄訟異其死刑之罪而要之三旬而職聽于朝司寇聽之斷其獄弊其訟于朝羣士

司刑皆在各麗其灋以議獄訟獄訟成士師受中計日
刑殺各就其縣肆之三日若欲免之則王命六卿會其
期

若邦有大役聚衆庶則各掌其縣之禁令若大夫有邦
事則為之前驅而辟其喪亦如之凡野有大事則戮其
犯命者

方士掌都家

不言掌其民數者其數自有都士家士掌之

聽其獄訟之辭辨其死刑之罪而要之三月而上獄訟于國

鄉士遂士縣士皆聽其獄訟察其辭者鄉遂公邑之吏雖以獄辭上而未成議附法也故親聽其獄訟而察其所上之辭都家之獄訟則已成議附灋矣故第聽其獄訟之辭而不復親聽其獄訟也死刑之罪獨曰辨者以未嘗親聽其獄訟辨之尤不可以不審也司寇聽其成于朝羣士司刑皆在各麗其灋以議獄訟

獄訟成士師受中書其刑殺之成與其聽獄訟者

不曰聽獄訟而曰聽其成者鄉師遂大夫遂師職皆
曰聽其治訟蓋以獄情上達于士而不自附其灋也
都家各有士以掌獄訟必與其君定議附灋而後上
于國故變文言成所以別于鄉遂公邑之未成者書
其獄訟之成與其聽之者以議成于下倘失實而有
反覆則罪其人也疑都家之獄訟質其成而犯者不
與之俱故方士第聽其辭司寇第聽其成書其成而

已蓋民訟以地比正之慮牽連佐証者因此失業也
凡却家之大事聚衆庶則各掌其方之禁令

方士十有六人言各掌其方者四人而主一方也

以時修其縣灋若歲終則省之而誅賞焉

縣灋縣師之灋也縣師掌邦國都鄙稍甸郊里之地
域而辨其夫家人民田萊之數及其六畜車輦之稽
方士以四時修此灋歲終又省之方士每歲行其誅
賞三年大比則縣師以考羣吏而詔廢置焉

凡都家之士所上治則主之

所上治謂獄訟之小事不附罪者主之方士自主聽
斷注謂告于司寇聽平之非也既曰三月而上其獄
訟于國司寇聽其成而復設此文何義哉蓋鄉師遂
師遂大夫皆王官也故獄訟之小者俾得自決都邑
小獄訟雖其君與士共成之而必取決于王官然後
政有本統也或謂上治猶上計主之謂據所上治廉
察都家士之能否益誤矣羣吏之治上于家宰考之

者宰夫與方士無與也

訝士掌四方之獄訟諭罪刑于邦國

告曉以麗罪及制刑之本意也

凡四方之有治于士者造焉

士士師也謂讞疑辨事先詣訝士乃達于士師也

四方有亂獄則往而成之

亂獄若君臣宣淫親戚相賊必往而成之者就其地

然後可以刺羣言得情實也

邦有賓客則與行人送逆之入于國則為之前驅而辟野亦如之居館則率其屬而為之蹕誅戮暴客者客出入則道之有治則贊之

凡邦之大事聚衆庶則讀其誓言禁

誓言禁不及賓客恐其徒有犯者故使訝士讀而為之備

朝士掌建邦外朝之灋左九棘孤卿大夫位焉羣士在其後右九棘公侯伯子男位焉羣吏在其後面三槐三

公位焉州長衆庶在其後左嘉石平罷民焉右肺石達窮民焉

視小司寇職所列增公侯伯子男者諸侯適來朝則與也

帥其屬而以鞭呼趨且辟禁慢朝錯立族談者

呼趨呼朝者各趨其位也錯立違其位也族談羣聚而談也

凡得獲貨賄人民六畜者委于朝告于士旬而舉之大

者公之小者庶民私之

人民謂刑人奴隸逃亡者大者公之官收之以待求索也若雞豚劔帶之細過時而不索則失者已棄置矣故使得者私之曰庶民私之者設士大夫得獲亦不私而貯于官也

凡士之治有期日國中一旬郊二旬野三旬都三月邦國期期內之治聽期外不聽

王志長曰期外不聽者謂鄉士遂士等不能決及弊

而不服赴愬于士者非鄉士遂士等所上之獄成也
踰期而獄成不上則宜誅責有司而速聽之豈得漫
付之不聽哉

凡有責者有判書以治則聽

判書分半而合者即傳別也

凡民同貨財者令以國灋行之犯令者刑罰之

同貨財即士師職所謂凶荒令民通財也天灾流行
令民通貨財以相濟而以國法行之為責其償與其

息則富者樂于出財而民常不困矣犯令謂多取息與能償而過期不償者士師令之朝士又令之犯者加刑罰焉所以使出者無顧惜而貸者不敢背也鄭司農謂司市為節以遣之凡商賈皆以節行不必同貨財也康成謂富人蓄積乏時出之價不得過騰躍平市禁貴儻者司市之職也二說並誤凡屬責者以其地傳而聽其辭

謂身亡而親屬執傳別以責者蓋或妻子軟弱或族

屬疎遠欺其不知故抵冒也若轉責使人歸之則必別有契約証者而無從抵冒矣地傳謂傳別有土人佐證者小司徒聽民訟所該者廣獨以其地附近之人正之不必有傳別故曰地比

凡盜賊軍鄉邑及家人殺之無罪

軍攻也春秋傳鄭祭足原繁洩駕以三軍軍其前使曼伯與子元潛軍軍其後又羅與盧戎兩軍之又鄭子罕宵軍之蓋盜賊攻剽鄉邑及家人禦而殺之者

無罪也不曰剽掠而曰軍者聚徒有兵異于劫請之盜也

凡報仇讎者書于士殺之無罪

若仇在本國既書于士則有司者當治之不宜聽其私殺矣蓋仇在異國將往報之先言其情于本國之士士覈得其實而書之他日殺仇于異國而自首其情則異國之士得訊于本國而釋其罪此王禁也通天下而統于王故有此法

若邦凶荒札喪寇戎之故則令邦國都家縣鄙慮刑貶慮謀也貶猶減也。○劉迎曰凶荒札喪寇戎之際澹不寬減則民滋不安而盜賊之變起先儒以為減用則非朝士所當慮也

司民掌登萬民之數自生齒以上皆書于版辨其國中與其都鄙及其郊野異其男女歲登下其死生

登上也下去也

及三年大比以萬民之數詔司寇司寇及孟冬祀司民

之日獻其數于王王拜受之登於天府內史司會冢宰貳之以贊王治

小司寇職曰內史司會冢宰貳之以制國用者以民數之登耗而制國用之多少也此職曰以贊王治者以民數之登耗而考政治之得失也

司刑掌五刑之灋以麗萬民之罪墨罪五百劓罪五百宮罪五百剕罪五百殺罪五百

墨黥也先刻其面以墨窒之劓截其鼻也宮者丈夫

則割其勢女子閉于宮中則斷足也周改臙作則殺
死刑也書傳曰決闕梁踰城郭而略盜者其刑臙男
女不以義交者其刑宮觸易君命革輿服制度姦宄
盜攘傷人者其刑劓非事而事之出入不以道義而
誦不詳之辭者其刑墨降畔寇賊劫略奪攘矯虔者
其罪死此二千五百罪之目畧也其刑書則亡夏刑
大辟二百臙辟三百宮辟五百劓墨各千周則變焉
至穆王作呂刑其數又變漢文帝除墨劓刑三刑宮

刑至隋乃除

若司寇斷獄弊訟則以五刑之灋詔刑罰而以辨罪之輕重

司刺掌三刺三宥三赦之灋以贊司寇聽獄訟宥少寬之也赦全舍之也

壹刺曰訊羣臣再刺曰訊羣吏三刺曰訊萬民必疑獄將行赦宥而後訊于衆也三訊而後決者非惟慮其失入亦慮其失出也

壹宥曰不識再宥曰過失三宥曰遺忘

李邦卿曰不識謂僻陋之人未識國法非下文生而蠢愚之比也過失謂無心遺忘謂疎狂之夫健忘者○凡赦宥乃誤公事失官物及失誤而遺害于人者注引殺人以證之非也凡過而殺傷人物者乃調人之所掌

壹赦曰幼弱再赦曰老耄三赦曰蠢愚

王介甫曰幼而不弱老而不耄愚而非蠢則不在所

赦

以此三灋求民情斷民中而施上服下服之刑然後刑

殺

三刺所以求民情也三宥三赦亦曰以求民情者求其情而不在可宥可赦之列然後罪無所疑而中可

斷刑可施

司約掌邦國及萬民之約劑治神之約為上治民之約次之治地之約次之治功之約次之治器之約次之治

執事之約次之

執當作贄六約据注疏皆典禮則之所頒也不宜有
約劑約劑者兩相爭而質成于上者也故書于宗彝
丹圖而有訟則辟藏神民地邦國之約也治神之約
如山川為兩國之望而巡狩柴望所供犧牲玉帛之
賦不齊治民之約如兩國接壤而相要毋受逋亡毋
掠邊鄙故達其約于王室也治地之約如春秋傳鄭
宋之間有隙地為成而虛之或江河移徙壤地或進

或戡而定其疆植者功器贄萬民之約也功功役也
春秋傳城成周宋仲幾不受功如涇澮畛涂比邑共
之而功役不齊地所產器比邑皆上供而為數不齊
故達其約于官府也治贄之約如昏姻既入幣以死
喪遷徙易期恐後有變而預聞于官六者皆事之變
也若典灋則之常則何約劑之有不分邦國萬民而
統言之者治神之小者萬民或有之治功之大者邦
國或有之

凡大約劑書于宗彝小約劑書于丹圖

此經所謂宗彝與尚書異蓋宗廟之典冊也約劑至衆非六藝所能備載且有詒者則辟藏數啓宗廟而視祭器非義所安也其義與鼎之有銘異銘祖考之功德于祭器宜也邦國萬民之約劑而書于天子祭器何義乎况祭器有定數而約劑日增將因約劑而別增祭器乎其不可通明矣丹圖如春秋傳著于丹書之類亦冊籍也

若有訟者則珥而辟藏其不信者服墨刑

訟謂訟所約如春秋傳宋仲幾薛宰之爭是也辟藏
開府視約書珥讀為衄謂殺雞取血釁其戶

若大亂則六官辟藏其不信者殺

大亂謂僭約凡邦之大盟約六官皆受其貳故皆辟
藏

司盟掌盟載之灋

載盟辭也盟者載其所要之事于策謂之載書加于

牲上而埋之

凡邦國有疑會同則掌其盟約之載及其禮儀北面詔明神既盟則貳之

有疑不協也明神謂其無不鑒照也詔讀載書以告之也貳之者寫副當以授六官○覲禮設方明之木著六玉以依日月山川之神

盟萬民之犯命者誣其不信者亦如之

犯命犯君之教令也不信違約也春秋傳臧紇犯門

斬關以出乃盟臧氏又鄭伯使卒出緞行出犬雞以
詛射潁考叔者

凡民之有約劑者其貳在司盟有獄訟者則使之盟詛
約劑之貳乃司約以入于司盟司約辟藏不信者服
墨刑而此復使之盟詛何也司約所謂不信者所訟
與約劑不符者也或約劑符而歷年久遠別有詐偽
則使要言于神以懼之

凡盟詛各以其地域之衆庶共其牲而致焉既盟則為

司盟共祈酒脯

祈者司盟為之祈明神使不信者必凶使其地域之人共牲與酒脯則或有知其實而相質証者且使為變詐者懼不見直于鄉里而他日不相保受也○李耜卿曰邦國之間或有讒人交構小將相惡大將相暴欲以王灋正之則彼此各有其是欲和之則終懷猜忌使詔于明神則雖有大疑亦兩釋矣若夫萬民之獄訟或情事曖昧無佐證可成其罪欲赦之則受

害者不甘欲罰之則為惡者不服計惟有盟詛對明
神而生愧懼且降祥降殃理實不爽乃所以佐王瘡
之窮而養民心之直也

職金掌凡金玉錫石丹青之戒令

青空青也此數者同出于山地官州人掌之此又掌
之者彼主取此主受也

受其入征者辯其物之嫩惡與其數量楬而璽之入其
金錫于為兵器之府入其玉石丹青于守藏之府入其

要

入征謂采金玉錫石丹青者之租稅也兵戈劍之屬
器鍾量之屬守藏者王府內府要凡數也入之于大
府○鄭剛中曰受其入則取諸地而官所自入者受
其征則取諸民而官所稅賦者

掌受士之金罰貨罰入于司兵

貨泉貝也金罰即入鈞金而理曲遂罰之者貨罰或
以泉貝代金也入于司兵給治兵及工直

旅于上帝則共其金版饗諸侯亦如之

銚金謂之版所施未聞

凡國有大故而用金石則掌其令

主其取之令也大故寇戎也蓋用為槍雷椎桴之屬
司厲掌盜賊之任器貸賄辨其物皆有數量賈而揭之
入于司兵其奴男子入于罪隸女子入于春槩

盜賊之妻子沒為奴者以充罪隸共舂槩也古者罪
人不孥謂凡有罪者盜賊極惡罪及其男女所以重

累其心且懲其未也

凡有爵者與七十者與未齒者皆不為奴

盜賊之親戚惟三者免為奴

犬人掌犬牲凡祭祀共犬牲用牲物伏瘞亦如之

伏伏犬以王車轢之即輶祭也聘禮云其牲用犬羊
瘞謂埋祭也爾雅祭地曰瘞埋

凡幾珥沈辜用駟可也

幾讀為訛珥讀為岬大宗伯職以埋沈祭山川林澤

以蹠辜祭四方百物

凡相犬牽犬者屬焉掌其政治

司圜掌收教罷民凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出圜土者殺雖出三年不齒

不使冠飾著墨幪

凡園土之刑人也不虧體其罰人也不虧財

不虧體疑即掌戮職所謂髡謂既改而髮仍可蓄也
惟髡故無冠飾若但加明刑不得曰刑人

掌囚掌守盜賊凡囚者上罪梏拳而桎中罪桎梏下罪
桎王之同族拳有爵者桎以待弊罪

凡囚者謂非盜賊以他罪拘者也在手曰梏在足曰
桎拳者兩手共一木也或曰梏者校也在首猶牛之
有梏

及刑殺告刑于王奉而適朝士加明梏以適市而刑殺

之

士羣士也加明梏謂書其姓名及罪于梏也自遂以外已各著刑殺之所惟六鄉無文故特著其適市也凡有爵者與王之同族奉而適甸師氏以待刑殺

掌戮掌斬殺賊諜而搏之

斬以鈇鉞要斬也殺以刀刃斷首領也搏當為搏謂去其衣也春秋傳殺而膊諸城上言賊則盜可知矣凡殺其親者焚之殺王之親者辜之

親有服者辜謂磔之

凡殺人者陪諸市肆之三日刑盜于市

陪僵尸也○李耜卿曰殺罪就市其餘四刑宮就蠶室餘刑就屏處所云五服三就也若盜則刑亦于市異于平人之犯罪者

凡罪之麗于灋者亦如之惟王之同族與有爵者殺之于甸師氏

李耜卿曰亦如之者死者亦陪之刑者亦各就其處

也殺之于甸師氏者謂不陪也陪者使衆見之也既刑于隱故不陪而肆之

凡軍旅田役斬殺刑戮亦如之

黃文叔曰注以戮為膊焚辜肆非也即下所謂髡者全其體而戮辱之耳

墨者使守門劓者使守闕宮者使守內刑者使守圜髡者使守積

五刑無髡或曰么族以髡首代宮刑但宮降為髡而劓

則者不獲減非所安也或曰髡當為完蓋居作三年
不虧體者觀此經則公家未嘗不畜刑人但君子不
近耳

司隸掌五隸之灋辨其物而掌其政令

物衣服兵器之屬

帥其民而搏盜賊役國中之辱事為百官積任器凡囚
執人之事

曰民者五隸皆百二十員員外則民也任猶用也除

兵器外家具之器皆是積為之聚也

邦有祭祀賓客喪紀之事則役其煩辱之事

士喪禮下篇曰隸人湮廁

掌帥四翟之隸使之皆服其邦之服執其邦之兵守王宮與野舍之厲禁

野舍王行所止舍也厲遮列也翟隸守禁司隸正掌其事師氏又使其屬董之

罪隸掌役百官府與凡有守者掌使令之小事

凡封國若家牛助為牽犂

牛助謂國以牛助轉徙也車轅內一牛前亦一牛用
二隸前牽而徬御之

其守王宮與其屬禁者如蠻隸之事

王明齋曰十四字宜屬閩隸以文義詳之不應未言
蠻隸而曰如蠻隸之事

蠻隸掌役校人養馬其在王宮者執其國之兵以守王
宮在野外則守厲禁

校人職有師圉而不見隸者蓋給其雜役

閩隸掌役畜養鳥而阜蕃教擾之

李耜卿曰役畜謂為掌畜之役也○閩隸所養非畜鳥也貉隸所養非常獸也珍禽竒獸不育于國乃列職以養之何也一切禁之則側媚之臣轉得居為竒貨以啗其上故列于六職以示其物為無竒掌于裔隸以示其役為甚賤正所以止邪于未形也

掌子則取隸焉

舊說俱不可通文有闕誤也三隸皆有守王宮與厲禁如蠻隸之文而此獨無則闕誤可知

夷隸掌役牧人養牛馬與鳥言其守王宮與其守厲禁者如蠻隸之事

春秋傳曰介葛盧聞牛鳴曰是生三犧皆用之矣其音云

貉隸掌役服不氏而養獸而教擾之掌與獸言其守王宮者與其守厲禁者如蠻隸之事

與禽獸言即所謂教擾之也能言之鳥必人與之言
而調習之猛獸媚養已者命以起伏動躍則應焉蓋
久而習于人言耳

周官集注卷九

欽定四庫全書

周官集注卷十

翰林院侍講銜方苞撰

布憲掌憲邦之刑禁正月之吉執旌節以宣布于四方而憲邦之刑禁以詔四方邦國及其都鄙達于四海

刑司寇五刑禁士師五禁也再言憲邦之刑禁者上所
言懸于畿內下所言懸于四方也曰及其都鄙謂
侯國之都鄙

凡邦之大事合衆庶則以刑禁號令

大事合衆庶者謂征伐巡狩田獵

禁殺戮掌司斬殺戮者凡傷人見血而不以告者攘獄者遏訟者以告而誅之

掌司斬殺戮者謂伺察行刑者使不得為姦惡以取利也近世殛殺絞縊行刑者能遲速其死以要賄主梏朴者亦能輕重其傷聖人知周萬物必早慮及此矣若吏民相殺不得云斬戮攘猶拒也謂濼當獄而

攘拒不受捕遏訟遏止欲訟者使不得達也

禁暴氏掌禁庶民之亂暴力正者撓誣犯禁者作言語而不信者以告而誅之

正者使人惴伏而從已也亂暴之民以力求正而不依于理灋戰國秦漢任俠奸人是也

凡國聚衆庶則戮其犯禁者以徇凡奚隸聚而出入者則司牧之戮其犯禁者

男女以國事聚于一所則必伺察而馴擾之

野廬氏掌達國道路至于四畿比國郊及野之道路宿
息井樹

國郊謂近郊遠郊野謂百里外至畿宿息謂止宿及
暫息之地井共飲食樹為蕃蔽

若有賓客則令守涂地之人聚橐之有相翔者則誅之
掌固修城郭溝池樹渠之固頒其士庶子及其衆庶
之守所謂守涂地之人也聚橐之聚擊橐以衛之也
相翔猶昌翔謂觀伺也

凡道路之舟車輦互者叙而行之

輦者相值而礙也互者交互而不行也

凡有節者及有爵者至則為之辟

亦使守涂地者

禁野之橫行徑踰者

橫行妄由田中徑踰射邪趨疾越隄渠也

凡國之大事比修除道路者掌凡道禁

道禁若漢時絕蒙布巾持兵杖之類

邦之大師則令掃道路且以幾禁行作不時者不物者國之大事既修除道路復特言大師掃道路者修除特平治之掃則凡餘糧之舄畝芻薪之露積雞豚之布路者一切掃清之以絕寇攘爭奪之端也

蜡氏掌除骹

骹死人骨也月令曰掩骼埋胔胔骨之尚有肉者人獸同

凡國之大祭祀令州里除不蠲禁刑者任人及凶服者

以及郊野大師大賓客亦如之

蠲潔也任人司圜所收教罷民任之以事者言郊及野者天地壇兆在郊師賓則至畿郊外曰野總言之也○李耜卿曰此掌其除之事

若有死于道路者則令埋而置楬焉書其日月焉縣其衣服任器于有地之官以待其人掌凡國之酖禁

有地之官主此地之吏也酖禁若孟春掩骼埋胔之屬○李耜卿曰此掌其酖之事

雍氏掌溝瀆澮池之禁凡害于國稼者春令為阱獲溝瀆之利于民者秋令塞阱杜獲

瀆水之竇也池陂障之水道也凡旱而壅水以溉潦則築隄自固皆害于他人之稼故禁之曰國稼者溝瀆澮池本以利通國之稼也阱穿地為塹以禦禽獸獲柞鄂也地堅阱淺則設柞鄂于其中春為阱獲防禽獸之害稼也故秋則塞之杜之

禁山之為苑澤之沈者

苑圃也澤地水至則陷未至既過皆可耕種若規為
洿池則其地永沉沒矣故同于山之為苑而禁之以
作無益害有益也

萍氏掌國之水禁幾酒謹酒禁川游者

水禁謂水中害人之處及入水捕魚鼈不時周制鄉
飲蜡醑皆有司及時量造所謂公酒是也則民間祭
祀冠婚必及時量造可知矣老疾則官給之所謂秩
酒及頒賜之酒是也幾酒謂苛察無事作酒及市沽

者謹酒謂戒毖其因事而多作者浮水曰游淺水可
浮川則波洋卒至恐至沉溺也

司寤氏掌夜時以星分夜以詔夜士夜禁

星見為夜沒則為晝夜士主行夜徼候者

禦晨行者禁宵行者夜遊者

晨先明也宵定昏也晨則門闕已啓故見行者而禦
之宵則遮閉以禁遏而已

司烜氏掌以夫遂取明火于日以鑿取明水于月以共

祭祀之明盞明燭共明水

夫遂陽遂也鑿鏡屬世謂之方諸明盞以明水修滌
淦盛黍稷明燭以照陳饌明水以配鬱鬯五齊與玄
酒別玄酒井水也以配三酒然以明水與玄酒對舉
則有異散文通謂之玄酒

凡邦之大事共墳燭庭燎

墳讀為黃麻也或曰大也樹于門外曰大燭于門內
曰庭燎

中春以木鐸修火禁于國中軍旅修火禁邦若屋誅則
為明竈焉

屋誅不殺于市而以適甸師氏者凡殺人皆肆之三日明暴其罪因不肆諸市而壙埋之故揭其罪于竈上或曰宮刑以下不可以風故于屋中誅之即勝國之社屋也屋中幽暗恐行刑者難見故穿屋以雷光謂之明竈○南方火位也故司燿通掌四時改火出納火之令職主于布火之利而不掌火禁其曰國失

火野焚萊則有刑罰焉蓋因布令而及之使民知避
其害非火禁也火禁如用火之地救火之灋以及夏
毋燒灰昆蟲未蟄不以火田之類以刑官之屬掌之
使民不敢犯也軍旅之火禁以刑官修之者非軍刑
所及也司烜掌明火故并共墳燭庭燎以為刑官之
屬故并為屋誅之竈焉

條狼氏掌執鞭以趨辟王出入則八人夾道公則六人
侯伯則四人子男則二人

趨辟趨而辟行人序官下士六人豈文誤與

凡誓執鞭以趨于前且命之誓僕右曰殺誓馭曰車轅
誓大夫曰敢不闕鞭五百誓師曰三百誓邦之大史曰
殺誓小史曰墨

前謂所誓衆之前行也命之者有司讀誓辭則大言
其刑以警所誓也士師五戒一曰誓用之于軍旅注
兼祭祀非也祭祀之誓言戒無所用殺轅之刑且大宰
掌之大司徒泣之非條狼氏所及也僕右不用命則

敗績故其灋重既曰僕右又曰馭蓋制馭一軍者即
軍帥也發命不衷出謀不審則以國予敵故其刑更
重于僕右大夫則與帥也事有當關白而不關者則
鞭之鞭作官刑故也師族師以下衆士也有當關而
不關者灋未減于大夫太史小史不掌軍事而其刑
殺墨者古者行軍重天時覘風雲物色以卜勝敗故
其責亦重也曰邦之太史小史者恐疑禮官不宜在
軍軍行別有太史小史如辟司徒公司馬之類故特

文出之以見即邦之太史小史也○王介甫以殺與車轅之刑過重又鞭不宜加于大夫遂謂此皆誓其屬不知軍事威克春秋傳田于孟諸楚申無畏扶宋公之僕戎僕大夫也晉侯之弟揚干亂行于曲梁魏絳戮其僕辭于晉侯曰至于用鉞則古者軍刑之重可知矣

脩閭氏掌比國中宿互櫜者與其國粥而比其追胥者而賞罰之

國中城中也宿宿衛也互謂行馬所以障禁止人也
凡吏士皆有常餼而宿衛守互擊櫜者中夜巡徼閱
其勞故官行糜粥以食之追胥者則但比其事行其
賞罰而已行夜者飯之則非時飲之以酒則慮其號
呶使自為粥則擾矣故官行之先王之政所以即人
之心而盡物之理也

禁徑踰者與以兵革趨行者與馳騁于國中者
邦有故則令守其閭互惟執節者不幾

令閭胥里宰之屬閭亦有互王政之周于守禦如此
冥氏掌設弧張為阱獲以攻猛獸以靈鼓毆之

弧張量罟之屬所以扃絹禽獸或曰機弩也毆之使
驚趨阱獲

若得其獸則獻其皮革齒須備

須謂頤下須備謂搔也

庶氏掌除毒蠱以攻說禴之嘉草攻之

攻說祈諸神以求去之也禴除也或曰宜讀為漬嘉

草藥物其狀未聞或曰柳宗元白蘘荷詩庶氏有嘉
草攻說事久泯豈嘉草即蘘荷與

凡毆蠱則令之比之

此官僅下士一人故人有能毆蠱者則令之而比次
其術之高下

穴氏掌攻蟄獸各以其物火之

蟄獸熊羆之屬穴居者也將攻之必先燒其所食之
物以誘出之穴伏而必誘取之者恐其時出而乘人

之隙也

以時獻其珍異皮革

珍異可備膳羞者如熊掌之類

翼氏掌攻猛鳥各以其物為媒而拑之以時獻其羽翮
猛鳥鷹隼之屬置其所食之物于絹中鳥下來則拑
其脚或曰以其類為招也螫獸猛鳥各設官以攻之
者非獨慮其害于人亦所以安衆鳥獸而使之生息
蕃滋也

柞氏掌攻草木及林麓

草字疑衍或曰草之與木叢生者則并除之柞氏攻木雍氏攻草皆主苑囿之官若畿內林麓欲化為穀土或以奠民居則第掌其政令下經凡攻木者掌其政令是也

夏日至令刊陽木而火之冬日至今剝陰木而水之刊剝皆謂斫去次地之皮火之水之則其肆不生○既斬去其木而後以水火焚漬其根株也

若欲其化也則春秋變其水火凡攻木者掌其政令

化猶生也謂時以種穀也所水則火之所火則水之
則其土和美○王介甫曰先王之于林麓欲用其材
則為之厲禁以養之欲用其地以居民興穡則刊剝
而化之此虞衡柞氏之職所以並設也○郝京山曰
謂化木而為土也

雍氏掌殺草春始生而萌之夏日至而夷之秋繩而芟
之冬日至而耜之

春草始萌以鉏基絕之夏草盛聚其族而刈之故曰
夷秋百穀皆熟恐以薙草傷穎實故引繩以遮列而
後芟其刈中之草冬則以耜反其土草根在上則春
不復生

若欲其化也則以水火變之掌凡殺草之政令

謂以火燒其所芟之草已而水之則其土和美月令
燒薙行水利以殺草可以糞田疇美土疆○王明齋
曰掌殺草者主公家之草薙氏自為之掌凡殺草之

政令者主場圃田疇之草教民為之

若族氏掌覆天鳥之巢以方書十日之號十有二辰之號十有二月之號十有二歲之號二十有八星之號縣其巢上則去之

天鳥惡鳴之鳥若鴉鵬方版也○鄭剛中曰鵲忌庚燕避戊巳虜逢申日則過街鵲作巢則避太歲狐潛上伏不越度阡陌虎豹知衝破然則天鳥避此五者必實有是理也○唐子西云聖惠方言有鳥夜飛謂

之無辜小兒衣服遭之輒成疾歐陽永叔鬼車詩言
其血污人家其家必破然則聖人設官以驅天鳥豈
可謂不急之務與

蕭氏掌除蠹物以攻崇攻之以莽草薰之

蠹物穿食人器物者攻崇六祈之二

凡庶蠱之事

庶氏掌除毒蠱蠱之病人者也此職庶蠱蠱之病物
者也

赤友氏掌除牆屋以蜃炭攻之以灰洒毒之

除牆屋隙罅間之蟲多也擣其炭粉之則走淳之以
灑之則死

凡隙屋除其狸蟲

隙屋人所不居埋藏之蟲尤易伏故特言之狸蟲麀
肌虺之屬

蠹氏掌去鼃龜焚牡鞠以灰洒之則死以其烟被之則
凡水蟲無聲

牡鞠鞠不革者齊魯之間謂鼃為蝮鼃耿鼃也以烟
被者順風而揚之也或以仄洒或以煙被者郊廟朝
廷學校嚴闕之地乃絕其類若會同師田所暫止則
使之無聲可矣曰凡水蟲不獨鼃龜也

壺涿氏掌除水蟲以炮土之鼓毆之以焚石投之

水蟲狐蜮之屬炮土之鼓瓦鼓也焚石得水作聲則
驚而避去○王振聲曰鼃鼃之屬穿穴堤防以焚石
投之則死

若欲殺其神則以牡槀午貫象齒而沈之則其神死淵
為陵

水之神龍罔象槀榆木名午貫者十字為之淵有神
而欲殺之必變見震驚于民者

庭氏掌射國中之天鳥若不見其鳥獸則以救日之弓
與救月之矢射之

救日之弓救月之矢謂日月食所用弓矢專言國中
者若山林田野則不必禦也曰鳥獸者既不見其形

則不辨其為鳥與獸也

若神也則以大陰之弓與枉矢射之

神謂非鳥獸之聲若春秋傳或叫于宋大廟譖譖出
出者大陰之弓即救月之弓枉矢即救日之矢互言
也救日用枉矢則救月以恒矢可知

銜枚氏掌司囂國之大祭祀令禁無囂軍旅田役令銜
枚

囂謹也

禁詔呼歎鳴于國中者行歌哭于國中之道者

野外則不必禁且不能徧也○劉氏曰聲大而急曰詔聲高而緩曰呼聲嗟而怨曰歎聲悲而傷曰鳴

伊耆氏掌國之大祭祀共其杖咸

咸讀為函老臣雖杖于朝祭祀則去杖有司函藏之既事乃授焉

軍旅授有爵者杖

將軍杖鉞羣帥皆執兵其有事于軍中而不親甲兵

者如小宗伯肆師大師大史小史師氏之類則不論其年齒皆授以杖用以別于即戎者軍中自主將至公司馬皆各有所統之人所司之局故不任軍事則別之曰有爵者

共王之齒杖

王賜老者之杖也

大行人掌大賓之禮及大客之儀以親諸侯

大賓要服以內諸侯大客其孤卿也禮必有儀互言

之且以別尊卑也

春朝諸侯而圖天下之事秋覲以比邦國之功夏宗以
陳天下之謨冬遇以協諸侯之慮時會以發四方之禁
殷同以施天下之政

六者皆諸侯入見之禮謨謀也時會即時見也禁謂
九伐之灋殷同即殷見也政謂邦國之九灋圖事比
功陳謨協慮不宜有一定之期而分四時以制灋者
亦舉其大略非截然不相通也春者事之方始秋則

功可以成夏則事既始而功未成故使陳其謀猷冬則此歲既終而來歲更始百事皆宜計慮協諸侯之慮非使諸侯協其慮謂諸侯所慮王與之協也如諸侯慮凶侵則王為之議賑發諸侯慮寇戎則王為之計備禦也

時聘以結諸侯之好殷覲以除邦國之慝

此二者諸侯使其臣入聘之禮邦國有交相惡者當衆聘其國卿皆在故諭使解除先儒或謂大宗伯職

時聘殷覲乃諸侯所以事天子此則天子所以答諸侯非也行人掌大賓之禮及大客之儀若此為王臣出聘覲則無所為大客之儀矣

間問以諭諸侯之志歸賑以交諸侯之福賀慶以贊諸侯之喜致禴以補諸侯之歲

此四者王臣出使之禮也間問者間歲一問諸侯謂存省之屬諭諸侯之志使皆曉然于天子之意也交者上下同之天子賜諸侯以賑而諸侯亦得以致福

于天子也贊助也致禴凶禮之弔禮禴禮也補其裁
謂歸以貨財

以九儀辨諸侯之命等諸臣之爵以同邦國之禮而待
其賓客

于諸侯言命其命尊也于諸臣言爵其命微也諸臣
之爵曰等者有卿大夫士之等又以大國次國小國
為之等使各有所當而後待之之禮可同也

上公之禮執桓圭九寸繅藉九寸冕服九章建常九旒

樊纓九就貳車九乘介九人禮九牢其朝位賓主之間
九十步立當車軹擯者五人廟中將幣三享王禮再裸
而酢饗禮九獻食禮九舉出入五積三問三勞諸侯之
禮執信圭七寸繅藉七寸冕服七章建常七旂樊纓七
就貳車七乘介七人禮七牢朝位賓主之間七十步立
當前疾擯者四人廟中將幣三享王禮壹裸而酢饗禮
七獻食禮七舉出入四積再問再勞諸伯執躬圭其它
皆如諸侯之禮諸子執穀璧五寸繅藉五寸冕服五章

建常五旒樊纓五就貳車五乘介五人禮五牢朝位賓
主之間五十步立當車衡擯者三人廟中將幣三享王
禮壹裸不酢饗禮五獻食禮五舉出入三積壹問壹勞
諸男執蒲璧其它皆如諸子之禮

常旌旗也旒其屬繆垂者貳副也三牲備為一牢禮
謂饗餼也朝位謂大門外賓下車及王車出迎所立
之處也王始立大門內交擯三辭乃乘車出迎軹轂
末也疾謂車轅曲中在軹之前衡之後衡在軹下當

服之領更前于疾以諸侯所立推之則王立其當軫
與廟受命祖之廟也三享三獻也皆束帛加璧庭實
惟國所有朝先享不言朝者朝禮無等不必言也王
禮王以鬱鬯禮賓也王使宗伯攝酌圭瓚而裸王拜
送爵又攝酌璋瓚而裸后拜送爵是謂再裸再裸賓
乃酢王一裸后不裸也饗設盛禮以飲賓也以飲為
主故以獻為節九舉舉牲體九飯也以食為主故以
舉為節出入謂從來訖去也每積有牢禮米未芻薪

問問不恙也勞苦倦之也按覲禮記偏駕不入王門
偏駕者諸侯所受上車同姓金路異姓象路四衛革
路蕃國木路皆舍于館而乘墨車以朝蓋覲禮天子
不下堂而見諸侯故諸侯不敢乘上車春夏受贄在
朝亦無迎灋惟朝後行三享在廟天子乘車出迎故
諸侯並得乘上車所以有繁纓九就之等也○服物
采章諸侯之所服也牢禮饗食王所以禮賓也非各
用其命數不可惟擯者之數則用其半以示在天子

所則有所屈也

凡大國之孤執皮帛以繼小國之君出入三積不問壹
勞朝位當車前不交擯廟中無相以酒禮之其它皆眡
小國之君

此以君命來聘也孤尊既聘享更自以其贄見執束
帛表以豹皮繼小國之君言次之也朝聘之禮每一
國畢乃前不交擯者不使介傳辭交于王之擯而親
自對擯也廟中無相介皆入門西上而立不前相禮

酒齊酒也以酒禮之謂不和鬱鬯以裸也其他謂
貳車及介牢禮賓主之間擯者將幣饗食之數知此
為更以贄見者若正聘則執瑑圭璋八寸不得執皮
帛也孤眡小國之君以五為節而公之卿乃七介者
卿奉君命故七介孤自特見故五介也孤出入三積
一勞與小國同而特文見之者卿亦三積一勞故不
得以視小國該之也

凡諸侯之卿其禮各下其君二等以下及其大夫士皆

如之

此亦以君命來聘者所下其君之禮介與朝位賓主之間也其餘則自以其爵聘義曰上公七介侯伯五介子男三介謂使卿聘之數也然則朝位亦以七十步五十步三十步為節與其大夫士皆如之者大夫又各自下其卿二等也聘禮曰小聘使大夫其禮如為介士無聘之介數而曰如之者士雖無介與步數至于牢禮之等又降殺大夫

邦畿方千里其外方五百里謂之侯服歲壹見其貢祀
物又其外方五百里謂之甸服二歲壹見其貢嬪物又
其外方五百里謂之男服三歲壹見其貢器物又其外
方五百里謂之采服四歲壹見其貢服物又其外方五
百里謂之衛服五歲壹見其貢材物又其外方五百里
謂之要服六歲壹見其貢貨物

要服即蠻服也大司徒職歲之常貢不宜有成器此
職器物則或兼尊彝之屬材物亦宜兼齒角羽毛之

屬也舊說虞夏之制天子巡狩之明年諸侯各以其方歲見四載而徧此經注其朝貢之歲四方各四分趨四時而來皆非也果爾則或一歲而空一方之諸侯或一歲而空一服之諸侯其國或大喪大札水旱寇戎將棄而不理乎竊意周制侯服最近故每歲一見而徧甸服地較遠分國較多兩歲中各以其時其事一見而徧男采衛要地愈遠分國愈多則期愈寬所以順人情便國事也虞夏之制亦大槩類此成王

之崩事在旬日而康王之立太保率西方諸侯入應門左畢公率東方諸侯入應門右則六服皆有朝者可知矣舜典曰覲四岳羣牧班瑞于羣后則非一方之諸侯可知矣○尚書六年五服一朝言六年中五服皆朝以徧非謂僅一朝也其不言六服者以徧朝為言故侯服每歲一朝者不數也與周禮本可通春秋傳叔向所言乃雜舉古制及文襄之憲令耳九州之外謂之蕃國世壹見各以其所貴寶為贄

九州之外夷服鎮服蕃服也世一見謂父死子立及嗣王即位乃一來朝

王之所以撫邦國諸侯者歲徧存三歲徧覲五歲徧省七歲屬象胥諭言語協辭命九歲屬瞽史諭書名聽聲音十有一歲達瑞節同度量成牢禮同數器脩灋則十有二歲王巡守殷國

撫猶安也曰撫邦國諸侯者撫諸侯乃所以撫邦國也存問其安否也覲視其治效也省察其風化也三

者皆所謂間問也歲者巡守之明歲以為始也屬猶聚也召其象胥瞽史聚于王朝而教習之也辭命者吟于鬼及邦交之禮辭也數器銓衡也灋八灋也則八則也達同修皆謂齋其灋式行至則齊等之也成平也蓋平其僭踰者小行人職適四方達六節成六瑞則十有一歲前王而巡者其小行人與凡諸侯之王事辨其位正其等協其禮賓而見之若有大喪則詔相諸侯之禮

若有四方之大事則受其幣聽其辭

四方之大事謂國有兵寇來告急也亦有贄幣以崇敬也聘禮曰若有言則以束帛如享禮

凡諸侯之邦交歲相問也殷相聘也世相朝也

小聘曰問殷中也中間久無事則大聘諸侯同方岳則有相朝之禮皆所以考禮一德以尊天子也大國聘于小國小國朝于大國敵國則兩君相朝故司儀于諸公諸侯皆言相為賓是也

小行人掌邦國賓客之禮籍以待四方之使者

通掌其禮籍而所待獨使臣也

令諸侯春入貢秋獻功王親受之各以其國之籍禮之
職貢雖有常而必時其歲之豐凶以為贏縮故往歲
之貢至春而後入之月令制諸侯職貢之數以季秋
蓋農收備入而後數可定也功謂治國家之狀至秋
則歲功成刑獄決凡治之狀可按驗矣故獻之

凡諸侯入王則逆勞于畿及郊勞胝館將幣為承而墮

入王朝于王也春秋傳曰宋公不王又曰諸侯有王王有巡
守眠館致館也承猶丞也三者皆為丞而擯之賓將幣
大宗伯為上擯郊勞舊說使大行人眠館使卿大夫

凡四方之使者大客則擯小客則受其幣而聽其辭

擯者擯而見之王受其幣而聽其辭則代之入告也
大客要服以內使臣小客蕃國使臣或曰孤卿為大
客大夫為小客或曰以國之大小為別也

使適四方協九儀賓客之禮朝覲宗遇會同君之禮也

存覲省聘問臣之禮也

適之也協合也○黃文叔曰朝覲宗遇會同諸侯所以尊天子也而通乎兩君之相朝亦君禮也存覲省聘問天子所以撫諸侯也而邦交之歲相問殷相聘亦臣禮也達天下之六節山國用虎節土國用人節澤國用龍節皆以金為之道路用旌節門闕用符節都鄙用管節皆以竹為之

此謂邦國之節也達之者亦齋式灋以齊等之虎人

龍三者諸侯使臣出聘所執旌符管三者
在國所用都鄙者公之子弟及卿大夫之采地也
凡邦國之民出至他邦他邦之民來入門闕為之節
其以徵令及家徙者鄉遂大夫及采地之吏為之節
皆使人執節以將之有期以反節此與掌節有異同者
天子使于諸侯諸侯使于天子其為節異則不合門闕道路節
異則不通此五節所以同也天子之都鄙與諸侯之
都鄙守之者爵等懸殊此管節角節所以異也無

玉節者行人所達惟使節邦國所守非所及也無貨
賄之璽節者國中所用亦非行人所及也疏引司關
職謂貨賄同用符節非也司關掌國貨之節以聯門
市即璽節也果同用符節則璽節何所用乎

成六瑞王用瑱圭公用桓圭侯用信圭伯用躬圭子用
穀璧男用蒲璧

成平也此適四方之事而首舉王用鎮圭者典瑞職
鎮圭以徵守則亦應使邦國知其形制也

合六幣圭以馬璋以皮璧以帛琮以錦琥以繡璜以黼
此六物者以和諸侯之好故

合者兩相配也五等諸侯享天子並用璧享后用琮
其大各如其瑞皆有庭實惟二王後用圭璋其于諸
侯則用琮璧子男之于諸侯則用琥璜凡二王後諸侯
相享之玉大小各降其瑞一等其使卿大夫覲聘亦
如之馬皮非幣而總云六幣者謂用之以當幣也○
王光遠曰以其通情而來則謂之好以其因事而來

則謂之故

若國札喪則令賻補之若國凶荒則令賙委之若國師
役則令槁禴之若國有福事則令慶賀之若國有禍哉
則令哀弔之凡此五物者治其事故

此五者其四大宗伯所掌凶禮其一嘉禮也復列于
此者設所至之國有此則令鄰國供具而後以復于
王故其文次于使適四方之後也蓋凶荒之賙委師
役之槁禴必待奏請則緩不及事即適遇其國札喪

禍哉福事亦必于常禮有加禮意乃洽且札喪禍哉
福事之小者或不敢以聞于王朝而王使適遇之則
不得為弗聞也者而過之也治其事故者酌財用多
少之宜施行緩急之節以及興發調移之灋也不見
恤禮蓋于師役中兼之○王光遠曰所作謂之事所
遭謂之故

及其萬民之利害為一書其禮俗政事教治刑禁之逆
順為一書其悖逆暴亂作慝猶犯令者為一書其札喪

凶荒厄貧為一書其康樂和親安平為一書凡此五物者每國辨異之以反命于王以周知天下之故

慝惡也猶圖也康樂謂民氣安樂和親謂鄰國交歡安平謂上下寧輯

節
司儀掌九儀之賓客擯相之禮以詔儀容辭令揖讓之

出接賓曰擯入贊禮曰相以詔者以禮告王

將合諸侯則令為壇三成宮旁一門

合諸侯謂有事而會也為壇於國外以命事三成三重也此宮壝土以為牆所謂壇壝宮也天子春帥諸侯拜日于東郊則為壇于國東夏禮日于南郊則為壇于國南秋禮山川丘陵于西郊則為壇于國西冬禮月四瀆于北郊則為壇于國北既拜禮而還加方明于壇上而祀焉所以教尊尊也覲禮曰諸侯覲于天子為宮方三百步四門壇十有二尋深四尺王巡守殷國為宮應亦如此令令封人也

詔王儀南鄉見諸侯土揖庶姓時揖異姓天揖同姓

王既祀方明諸侯上介皆奉其君之旂置于宮乃詔
王升壇諸侯皆就其旂而立諸公中階之前北面東
上諸侯東階之東西面北上諸伯西階之西東面北
上諸子門東北面東上諸男門西北面東上王揖之
者定其位也庶姓無親者異姓昏姻之國也土揖者
不舉手即向下揖時揖則略舉手而後向下天揖則
高揭手而後向下也

及其擯之各以其禮公於上等侯伯於中等子男於下等

謂執玉而前見于王也擯之各以其禮者謂擯公者五人侯伯四人子男三人也上等中等下等謂奠玉處也壇三成深四尺則每等一尺也壇十有二等方九十六尺則堂上二丈四尺每等丈二尺與諸侯各于其等奠玉降拜升成拜明臣禮也既乃升堂授王玉下云將幣據三享故知此擯之為執玉見王

其將幣亦如之其禮亦如之

禮謂以鬱鬯裸之亦如之者皆于其等之上

王燕則諸侯毛

毛謂不問爵之尊卑以年齒相先後也朝事尊尊尚

爵燕則親親尚齒

凡諸公相為賓主國五積三問皆三辭拜受皆旅擯再
勞三辭三揖登拜受拜送

相為賓謂相朝也賓所停止則積問闕則問行道則

勞其禮皆使卿大夫致之從來至去數如此也積問不言登受之于庭也旅讀如鴻臚之臚謂陳之也賓之介九人使者七人皆陳擯位不傳辭賓之上介出請使者則前對拜送送使者據下經主君郊勞則遠郊及勞于境當使卿聘禮宰夫朝服設飧致飧于國客之禮也此諸侯相賓則殮當使卿殮積同禮則積亦當使卿惟問為小禮使卿與大夫無考

主君郊勞交擯三辭車逆拜辱三揖三辭拜受車送三

還再拜

交擯者各陳九介使傳辭也前三辭辭主君之親出也後三辭辭郊勞之幣物也卿大夫聘及郊主君使卿以束帛勞夫人使大夫以棗栗勞則國君相為賓郊勞必有幣玉邊豆之屬故曰三辭拜受也三還主君還辭賓再拜賓拜送也

致館亦如之致殮如致積之禮

館舍也使大夫授之君又以禮親致焉凡云致者皆

有幣以致之

及將幣交擯三辭車逆拜辱賓車進答拜三揖三讓每
門止一相及廟惟上相入賓三揖三讓登再拜授幣賓
拜送幣每事如初賓亦如之及出車送三請三進再拜
賓三還三辭告辟

三揖者朝位相去九十步揖之使前也至而三讓讓
入門也每門止一相彌相親也賓三揖三讓讓升也
賓亦如之當為儼謂以鬱鬯禮賓也上于下曰禮敵

者曰儻三請三進請賓就車也每一請車一進欲遠送也三還三辭者主君一請賓亦一還一辭至三請賓三辭則主君再拜以送賓而賓告已辟去也注授幣當為受幣非也未有置賓之送幣而先言主君之受幣者蓋再拜句斷賓三揖三讓而升堂則主君拜其至也授幣賓拜送幣言授幣時賓拜而送之也授幣非國君所親必上相授之而君拜送以致敬耳每事如初謂享及有言主賓皆交拜也

致饗餼還主饗食致贈郊送皆如將幣之儀

六禮皆主君所親故兩君相見之禮同也惟饗食速賓其餘主君親往

賓之拜禮拜饗餼拜饗食賓繼主君皆如主國之禮

拜禮者拜郊勞之禮也主君郊勞以禮于賓次日賓入將幣所以答主君之禮也其致饗餼及饗食之次日賓亦入拜蓋主君既親之則賓無不答也所謂賓繼主君即此謂隨而答其禮也不言拜還主者還主

與致饗餼同時也不言拜致贈郊送者賓入辭而主君出贈送則遂行矣

諸侯諸伯諸子諸男之相為賓也各以其禮相待也如諸公之儀

賓主相待之儀與諸公同其饗餼饗食之禮則有降殺

諸公之臣相為國客則三積皆三辭拜受

不言登受者受之于庭也注謂侯伯之臣不致積據

聘禮無致積之文然此經曰凡侯伯子男之臣相為客而相禮其儀亦如之則不應無積可知矣豈道路共積無以束帛致積之禮而記者遂略之與

及大夫郊勞旅擯三辭拜辱三讓登聽命下拜登受賓使者如初之儀及退拜送

登聽命賓登堂以聽主君之命也賓使者亦當為僎蓋主國以束帛勞而賓以束錦僎使者也如初之儀使者亦三辭而後拜受也按聘禮侯伯之臣受勞于

庭致館亦于庭此並登聽命公之臣尊也

致館如初之儀

如郊勞也按聘禮致館無束帛賓亦無饋不言致殮者君子聘大夫不致殮也聘禮曰殮不致賓不拜

及將幣旅擯三辭拜逆客辟三揖每門止一相及廟惟君相入三讓客登拜客三辟授幣下出每事如初之儀三辭辭主君以大容禮當已也客辟不敢答禮也惟君相入客相不敢入也拜主君拜客至也客三辟三

退負序也三讓客登與上經賓三揖三讓登同拜與上經再拜同客三辟而後授幣則未授幣不宜預設受幣之文益明矣不敢拜送者奉君命以將事非已所專也故私面私獻皆再拜稽首

及禮私面私獻皆再拜稽首君答拜

禮以醴禮客也私面私覲也既覲則或有私獻者此三者皆于聘之日行之故并言之春秋傳楚公棄疾見鄭伯以其乘馬私面

出及中門之外問君客再拜對君拜客辟而對君問大夫客對君勞客客再拜稽首君答拜客趨辟

中門之外即大門之內也問君曰君不恙乎對曰使臣之來寡君命臣于庭問大夫曰二三子不恙乎對曰寡君命使臣于庭二三子皆在勞客曰道路悠遠客甚勞勞介則曰二三子甚勞既曰再拜對又曰辟而對者前對問不恙後對或別問君之所為也後曰君答拜前第曰君拜者非答客也聞其君之起居不

恙則如親見而拜以致敬也必出中門而後問者諸侯相為賓則主君郊勞今郊勞不親故出廟而後問示不敢即安若欲就客而問之也或謂廟中禮敬不可及其餘非也私面私獻皆于廟而反不可問君大夫乎

致饗饌如勞之禮饗食還圭如將幣之儀

注謂饗食亦君不親而使大夫以幣致者非也所以如將幣之儀而異于郊勞者正謂君親饗食故與將

幣見君之儀同耳若大夫致之則當如郊勞之禮矣
還圭主君弗親而亦如將幣之儀者將幣以圭則還
圭者兩國相答之正禮也雖大夫致之若主君之臨
而以不敢答禮焉故据聘禮迎于門外而不拜猶將
幣時主君拜至客辟而不敢答拜異于郊勞之拜辱
也聽命受圭負右房而立猶授幣不拜而下異于郊
勞之聽命下拜登受也其儀與將幣不同而曰如將
幣之儀謂不敢答禮如親見主君而受命耳郊勞曰

禮者有饋使者之幣故兼儀與物而言之

君館客客辟介受命遂送客從拜辱于朝

君館客者客將去就省之也遂送君拜以送客也

明日客拜禮賜遂行如入之積

客將行總拜主君之禮賜也如入之積亦三積也

凡侯伯子男之臣以其國之爵相為客而相禮其儀亦如之

不曰以其爵而曰以其國之爵者記曰次國之上卿

位當大國之中中當其下下當其上大夫小國之上卿位當大國之下卿中當其上大夫下當其下大夫凡四方之賓客禮儀辭命餼牢賜獻以二等從其爵而上下之

二等謂降殺以兩即大行人職所謂諸侯之卿各下其君二等大夫士亦如之也上言爵等同者相為賓客之禮此則言爵等不同者相為賓客之禮

凡賓客送逆同禮凡諸侯之交各稱其邦而為之幣以

其幣為之禮

幣享幣也。大國則豐，小國則殺。主國如其豐，殺而禮之。

凡行人之儀，不朝不夕，不正其主面，亦不背容。

謂擯相傳辭時也。不正東鄉，不正西鄉，常視賓主之前，却得兩鄉之司儀。掌擯相之禮，以詔儀容辭令，揖讓之節，故行人受儀灋焉。

行夫掌邦國傳遽之小事，媿惡而無禮者，凡其使也必

以旌節雖道有難而不時必達

傳遽若後世馳驛而使者倣吉事也惡凶事也無禮
禮籍所不載也道有難謂遭疾病他故也其大事有
禮者有故則介傳命不嫌不達○不曰吉凶而曰美
惡者如王小有問勞雖美而不得謂之吉小有詰讓
雖惡而不得謂之凶也

居于其國則掌行人之勞辱事焉使則介之

先儒謂使必大小行人非也大行人二人小行人四

人掌賓客之禮事豈能供聘覲存省問喪荒弔禮恤
以及賑膳慶賀之役哉司士職曰作士適四方為介
者凡國使之介也此曰使則介之者惟十有一年小
行人使適四方以協禮事則行夫為之介也居于其
國謂介行人而居所適之國也不先言介者文當然
也如曰行人使則介之居于其國掌行人之勞辱事
則贅矣

環人掌送逆邦國之通賓客以路節達諸四方舍則

授館令聚橐有任器則令環之凡門關無幾送逆及疆
路節旌節也四方圻上也逆賓于疆及宿令橐歸送
亦如之掌訝之職也而又設環人所以待過賓于王
畿而之列國者故曰通賓客又曰以路節達諸四方
又曰門關無幾送逆及疆則非止而有事者明矣曰
環人者環四境而待過賓以達之于四方也

象胥掌蠻夷閩貉戎狄之國使掌傳王之言而諭說焉
以和親之若以時入賓則協其禮與其辭言傳之

凡其出入送逆之禮節卽幣帛辭令而賓相之

幣帛王所賜予也辭令告諭之辭也賓相為擯而相
侑其禮儀也

凡國之大喪詔相國客之禮儀而正其位凡軍旅會同
受國客幣而賓禮之凡作事王之大事諸侯次事卿次
事大夫次事上士下事庶子

凡國之大喪以下乃掌客職錯簡蓋象胥之職前所
列已備矣而掌客未及大喪詔相國客儀位軍旅會

同受幣賓禮國客則職事有缺也卿大夫士庶子謂從諸侯而來賓者喪紀軍旅會同之大事使諸侯次事小事并及諸侯之卿大夫士庶子使觀禮且周事也諸子職會同賓客士庶子必從春秋傳同盟于戲六卿及大夫門子皆從鄭伯則于王事可知矣若王朝之卿大夫士則贊王命而戒之者冢宰王朝之士庶子則作之者諸子非掌客所及也既曰凡作事又曰王之大事者正以見所作卿大夫士皆侯國之人

而事則王朝之事耳○惟諸侯之從者故所任止上士若王臣則中下士與事者多矣

掌客掌四方賓客之牢禮餼獻飲食之等數與其政治政治邦新殺禮之屬

王合諸侯而饗禮則具十有二牢庶具百物備諸侯長十有再獻

大合諸侯則其長必二王之後也故備天子儀物示賓而不臣

王巡守殷國則國君膳以牲犢令百官百姓皆具從者
三公眡上公之禮卿眡侯伯之禮大夫眡子男之禮士
眡諸侯之卿禮庶子壹眡其大夫之禮

犢角繭栗者牲孕則天子不食令者掌客令主國也
大行人職曰十有二歲王巡守殷國此職又曰王巡
守殷國而下載諸侯膳王之禮則殷同即巡守而會
諸侯于方岳所謂施天下之政者即尚書王制所載
巡守諸大政舊說王不巡守而六服盡朝非也春秋

傳曰先王卜征五年而歲其祥祥習則行不習則增
修德而改卜設王當巡守之歲以喪疾不行自可于
疾已喪畢之後行之不宜更曠其期至十有二年之
久且王果喪疾又不應日覲四方之諸侯也況巡守
者巡所守也豈可以諸侯之朝代哉六服之君無歲
不朝以圖事比功而又一歲而徧召之義無所取當
以經文正之不曰諸侯膳以牲犢而曰國君者惟所
至之國然也

凡諸侯之禮上公五積皆眡殮牽三問皆脩羣介行人
宰史皆有宰殮五牢食四十簋十豆四十鉶四十有二
壺四十鼎簋十有二牲三十有六皆陳饗餼九牢其死
牢如殮之陳牽四牢米百有二十筥醢醢百有二十甕
車皆陳車米眡生牢牢十車車兼有五數車未眡死牢
牢十車車三秬芻薪倍禾皆陳乘禽日九十雙殷膳大
牢以及歸三饗三食三燕若弗酌則以幣致之凡介行
人宰史皆有殮饗餼以其爵等為之牢禮之陳數唯上

介有禽獻夫人致禮八壺八豆八籩膳大牢致饗大牢
食大牢卿皆見以羔膳大牢侯伯四積皆眡飧牽再問
皆脩飧四牢食三十有二簋八豆三十有二釧二十有
八壺三十有二鼎簋十有二腥二十有七皆陳饗餼七
牢其死牢如飧之陳牽三牢米百筥醢醢百甕皆陳米
三十車禾四十車芻薪倍禾皆陳乘禽日七十雙殷膳
大牢三饗再食再燕凡介行人宰史皆有飧饗餼以其
爵等為之禮唯上介有禽獻夫人致禮八壺八豆八籩

膳大牢致饗大牢卿皆見以羔膳特牛子男三積皆眡
殮牽壹問以脩殮三牢食二十有四簋六豆二十有四
鈞十有八壺二十有四鼎簋十有二牲十有八皆陳甕
餼五牢其死牢如殮之陳牽二牢米八十筥醢醢八十
甕皆陳米二十車禾三十車芻薪倍禾皆陳乘禽日五
十雙壹饗壹食壹燕凡介行人宰史皆有殮饗餼以其
爵等為之禮唯上介有禽獻夫人致禮六壺六豆六籩
膳眡致饗親見卿皆膳特牛

積皆視殮牽謂所共如殮而牽牲以往不殺也生而致之以一夕遷次不盡用也不殺則無銅鼎簋簠之實其米實于筐豆實實于甕壺之有無未聞脩脯也殮客始至致小禮也公侯伯子男殮皆飪一牢其餘牢則腥食謂庶羞美可食者簋稻粱器也豆菹醢器也銅羹器也禮之大數銅少于豆公銅宜三十八侯伯二十八子男十八壺酒器也鼎牲器也簋黍稷器也合言鼎簋者牲與黍稷乃食之主也故公侯伯子

男其數皆十有二無加損焉牲當作腥謂腥鼎也于
侯伯云腥二十有七乃本字也諸侯禮盛腥鼎有鮮
魚鮮腊每牢皆九為列公腥鼎三十六腥四牢也侯
伯二十七腥三牢也子男十八腥二牢也皆陳皆陳
列也凡此皆殮門內之實也其車米禾芻薪則陳于
門外饗餼既相見致大禮也死牢如殮之陳亦飪一
牢餘腥牽生牢也車皆陳車字衍米車載米之車也
聘禮曰十斗曰斛十六斗曰簋十簋曰秉每車秉有

五數則二十四斛也禾稾實并刈者聘禮曰四秉曰
筥十筥曰稬十稬曰秬每車三秬則三十稬也稬猶
束也米禾之秉筥字同數異禾之秉手把耳筥讀為
棟栲之栲謂一齊也秉禽秉行羣處之禽謂雉雁之
屬于禮以雙為數殷中也中又致膳亦念賓也若弗
酌謂君有故不親饗食燕也不饗則以酬幣致之不
食則以侑幣致之凡介行人宰史衆臣從賓者也以
其爵等為其牢禮之陳數大行人職所謂諸侯之卿

各下其君二等及其大夫士亦如之也夫人致禮助君養賓也致之皆使下大夫于子男曰膳視致饗則是不復饗也卿皆見者見于賓也既見之又膳之亦助君養賓也于子男曰親見卿皆膳特牛見卿于小國之君有不特造館見者其造見者乃致膳也此經獨言諸侯相朝主國待賓之禮者天子待諸侯之禮亦然故舉下以包上也殮禮不言米禾芻薪者以積視殮率則殮有米禾芻薪不必言矣○疏謂君用脩

臣用宰非禮疑有誤非也羣介行人宰史皆有宰致積之宰也其文係于三問皆脩之下者問君以脩則不疑于宰為臣之問也不曰皆有積何也曰有宰則致積可知曰有積則嫌于君之積有宰而臣之積無宰也曰羣介行人宰史皆有殮饗餼又曰各以其爵等為宰禮之陳數亦此義也注謂諸臣宰禮之數惟以爵不以命數亦非也果爾則子男之卿陳數與君同矣注宰禮陳設之位與數皆約聘禮言之他無所

見

凡諸侯之卿大夫士為國客則如其介之禮以待之
謂特來聘問待之如為介之禮也

凡禮賓客國新殺禮凶荒殺禮札喪殺禮禍裁殺禮在
野在外殺禮

環人職凡國之大喪節應次此節下

凡賓客死致禮以喪用賓客有喪惟芻稍之受

死則主人為之具而殯矣喪用者饋奠之物賓客有

喪謂父母或君死也芻給馬牛稍人廩也

遭主國之喪不受饗食受牲禮

牲禮腥致者饗食則全不受殮饗餼亦止受腥牢有
喪不忍煎烹也禮不當受則主人不以熟致非致而
不受

掌訝掌邦國之等籍以待賓客

若將有國賓客至則戒官脩委積與士逆賓于疆為前
驅而入

士訝士也

及宿則令聚橐及委則致積至于國賓入館次于舍門外待事于客及將幣為前驅至于朝詔其位入復及退亦如之

入復入告王以客至也退亦如之仍為前驅也

凡賓客之治令訝訝治之

注謂賓客之治為正貢賦理國事非也邦國之貢冢宰制之其典冢宰施之地灋司徒頒之禮事宗伯令

之獄訟司寇定之而又使司馬兼董焉非訝士所得
治明矣訝士掌四方之獄訟邦有賓客則誅戮恭客
者客出入則導之有治則贊之蓋或賓客之僕隸廝
輿與邦人有爭或賓客之屬自犯灋禁其在王朝皆
不敢自治而以歸于掌訝掌訝使訝士治之訝士職
曰有治則贊之者即贊掌訝也晉人執宋仲幾于京師
春秋以為非常而志之則周之舊典可知矣
凡從者出則使人道之及歸送亦如之

從者凡介以下也人其屬胥徒也送至于境如其前
驅聚櫟待事之屬

凡賓客諸侯有卿訝卿有大夫訝大夫有士訝士皆有
訝

此謂朝覲聘問之日王所使迎賓客于館之訝也不
曰則而曰有者大國之君有卿訝而小國之君則大
夫訝大國之卿有大夫訝而小國之卿則士訝若小
國之大夫及列國之士則雖有訝者而非命士矣知

然者列國之士天子無使命士往訝之義也司士職會同賓客作士從諸子職會同賓客作羣子從則訝列國之士者其諸王朝未授職之士與庶子與

凡訝者賓客至而往詔相其事而掌其治令

凡訝者謂上所云卿大夫士皆待賓客至館而後往非若掌訝之逆于疆也掌訝惟至于朝詔其位而已此訝者則詔相其禮事掌訝及退為之前驅而已若賓有治王有令于賓則此訝者通掌之

掌交掌以節與幣巡邦國之諸侯及其萬民之所聚者道王之德意志慮使咸知王之好惡辟行之

萬民之所聚者謂大都會也辟讀如辟忌之辟謂使知王之所好者而為之知王之所惡者辟而不為列職八人而能徧巡邦國者各主其方而不限以程期也使和諸侯之好達萬民之說

說所喜也達者達之于王若其國君

掌邦國之通事而結其交好

注通事謂朝覲聘問非也朝覲聘問禮有常經無為別設官以掌之蓋非朝聘之期而鄰國有事欲相通則因王官之巡行而達其意也其事如通防交糴聯婚媼詰逋逃之類

以諭九稅之利九禮之親九牧之維九禁之難九戎之威

九稅司徒所掌也九禮宗伯所頒也九牧冢宰所建也九禁九戎司馬所專也而使刑官之屬諭之者蓋

邦國不能率由典常則刑禁及之刑禁不能施則兵
戎詰之與司馬九瀆兼備五官之職其義略同獨無
冬官之瀆者居四民時地利惟始立國用之建國之
後未有無故而變冬官之瀆者故不之及也

掌察

闕

掌貨賄

闕

朝大夫掌都家之國治日朝以聽國事故以告其君長
序官曰每國上士二人下士二人則國治即都家之

治也

國有政令則令其朝大夫

李耜卿曰上文國事故乃天子日所施為者聽之以告其君長使知王之所好惡而辟行之也此政令乃當施于都家者

凡都家之治于國者必因其朝大夫然後聽之惟大事弗因

都家所有治事上王國必因朝大夫以通然後受而

聽之若大事如寇戎荒喪之類則直達

凡都家之治有不及者則誅其朝大夫在軍旅則誅其有司

不及謂有稽滯有司都司馬家司馬也

都則

闕

都士

闕

家士

闕

李耜卿曰自大司寇小司寇士師而下鄉士主國獄

遂士主郊縣士主野方士主都家畿內也訝士主四方畿外也次以朝士者斷獄弊訟皆于外朝也次以司民者見民者天之所司王之所敬刑罰不可以不中也獄訟既弊有五刑以麗其辟故次司刑有刺宥以議其輕重故次司刺有大亂獄則故府之臧可覆視故次司約有疑獄不決則明神可鑒故次司盟于是罪輕而贖刑者則職金受其入罪重而拏戮者則司厲執其灋稍重而未麗于灋者則司圜主收教之已

在刑者則囚而刑殺故掌囚掌戮又次之從坐者恕其死因任以事故司隸罪隸又次之征伐四夷所得蠻閩夷貉四隸又次之繼犬人于司厲者司厲治盜犬能逐盜者也雖然刑非得已也禁于未發則民安而上不煩故布憲禁于天下禁殺戮禁暴氏禁于國中野廬氏蜡氏雍氏萍氏司寤氏所以使行者無害死者有主陸走者無險阻水浮者不沒溺時其宵晝行止以節皆道路之禁也司烜氏條狼氏脩閭氏皆

祭祀軍旅之禁也自冥氏至庭氏十二職草木鳥獸
為民害者驅而除之義之盡也繼以銜枚氏司鼙者
無端歌哭雜氣妖聲不祥也于是刑事畢矣次以伊
耆氏者秋養耆老故也次以大行人小行人諸職者
賓位于西北天地之義氣也又儀禮凡諸侯朝覲會
同禮畢則降而肉袒請刑故以屬刑官賓客見王則
有儀故司儀次之而行夫掌小事環人掌送逆象胥
掌四夷國使以類屬焉賓客朝見既畢有饗飧牢禮

之歸故掌客次之賓客自來至去皆有訝故掌訝次
之掌交所以喻王志于天下之邦國也朝大夫所以
達王事于畿內之都家也故以是終焉其掌察掌貨
賄都則都士家士文闕義無所考



周官集注卷十